




趙天樂選唐衆妙集家數

沈佺期二首



盧象一首



王維七首

孟浩然四首



錢起八首

周賀九首

于武陵三首

李頻六首

秦系二首

劉長卿二十三首

李嘉祐九首

楊巨源二首

劉得仁三首

朱慶餘五首

雍陶四首

郎士元四首

崔塗七首

皇甫曾二首

皇甫冉九首

司空曙六首

嚴維二首

韓翃三首

盧綸七首

綦毋潛一首

靈一三首

護國一首

岑參二首

張南史一首

包佶一首

耿緯五首

李端四首

戴叔倫五首

祖詠二首

方干七首

無可三首

貫休二首

張衆甫一首

周朴一首

張蠙三首

李季蘭一首

張祐佐一首

張循之一首

章八元一首

張喬一首

于鵠一首

項斯三首

包何一首

趙嘏一首

張祐四首

許渾二首

馬戴二首

張繼一首

李益二首

呂溫一首

崔顥一首

崔峒一首

竇常一首

薛能一首

劉威一首

鄭谷一首

韓偓一首

羅隱一首

李羣玉一首

皮日休一首

杜荀鶴五首

張籍三首

任藩二首

劉商一首

楊發一首

處默一首

戎昱一首

于良史一首

王湾一首

林寬一首

劉禹錫八首

王貞白一首

已上七十六家共二百二十八首

衆妙集



宋人

汴人趙

師秀

紫芝編



沈佺期

塞北

胡騎犯邊埃風從旦上來五原烽火急六郡羽
書催水壯飛狐冷霜濃候鴈哀將軍朝授鉞戰
士夜銜枚紫塞金河裏葱山鐵勒隈蓮花秋劍
發桂葉曉旗開秘略三軍動妖氣百戰推何言
投筆去終作勒銘回

同蘇負外味亥夏晚寓直省中

並命登僊閣分宵直禮闈大官供宿膳侍史護
朝衣卷暢天河入當階月露微小池殘暑退高
樹晚涼歸冠劍無時釋軒車待漏飛明朝題漢
柱三署有光輝

盧象

趙都護宴別

結客候旌麾元戎復在斯門閤都護府兵動羽
林兒黠黠虜多翻覆謀臣有別離智同天所授恩
向日相隨漢使開賓幙胡笳送酒危風霜迎馬
首兩雪事魚麗在策應無戰深情屬載馳不應

行萬里明主寄安危

王維

從岐王過楊氏別業

揚子談經所淮王載酒過興闌啼鳥喚坐久落
花多逕轉回銀燭林開散玉珂嚴城時未啓前
路擁笙歌

山居

寂寞掩柴扉蒼茫對落暉鶴巢松樹遍人訪華
門稀綠竹含新粉紅蓮落故衣渡頭燈火起處
處採菱歸

終南山行

太乙近天都連山到海隅白雲回望合青霽入
看無分野中峰變陰晴衆壑殊欲投人宿處隔
水問樵夫

觀獵

風勁角弓鳴將軍獵渭城草枯鷹眼疾雪盡馬
蹄輕忽過新豐市還歸續柳營回看射鵰處千
里暮雲平

送丘為落第歸江東

憐君不得意况復柳條春為客黃金盡還家白

髮新五湖三畝宅萬里一歸人知爾不能薦羞

稱獻納臣爾一作爾

送晁監歸日本

積水不可極安知滄海東九州何處所萬里若
乘空向國惟看日歸颿但信風鰲身映天黑魚
眼射波紅鄉樹扶桑外主人孤島中別離方異
域音信若為通

秋歸輞川莊作

積雨空林烟火遲蒸藜炊黍餉東菑漠漠水田
飛白鷺陰陰夏木轉黃鸝山中習靜觀朝槿松

下清齋折露葵野老與人爭席罷海鷗何更事
相疑

孟浩然

歲晚歸南山

北闕休上書南山歸弊廬不才明主棄多病故
人踈白髮催年老青陽逼歲除永懷愁不寐松
月夜窻虛

夜渡湘水

客行貪利涉夜裏渡湘川露氣聞芳杜歌聲識
採蓮榜人投岸火漁子宿潭烟旅時行相問泚

陽何處邊

洞庭湖

八月湖水平涵虛混太清氣蒸雲夢澤波動岳
陽城欲濟無舟楫安居恥聖明坐看垂釣者空
有羨魚情

過故人莊

故人具雞黍邀我至田家綠樹村邊合青山郭
外斜開筵面場圃把酒話桑麻待到重陽日還
來就菊花

錢起

送劉相公催轉運事

國用資戎事臣勞為主憂將徵任土貢更發濟
川舟擁傳星還去過池鳳不留惟高飲冰節稍
淺別家愁落葉淮邊雨孤山海上秋遙知謝公
興微月在江樓

送少微師西行

隨緣忽西去何日返東林世路無期別空門不
住心人烟一飯少山雪獨行深天外猿啼處誰
聞清梵音

暇日題草堂

為郎過壯歲晚景對秋天門掩蒼苔上池清寒
竹前通經未拾紫煉藥不成仙且醞東臯黍愁
來得醉眠

寄鄧州郎使君

龍節知無事江城不揜扉詩傳過客遠書到故
人稀坐嘯看潮艇行春送鴈歸望舒三五夜思
盡謝玄暉

送彈琴李長史赴洪州

抱琴為傲吏孤櫂復南行幾處秋江水皆添白
髮聲佳期來客夢幽興緩王程佐牧無勞問心

和政自平

裴迪書齋翫月

夜來詩酒興月上謝公樓影閉重門靜寒生獨
樹秋鵲驚隨葉散螢遠入烟流今夕遙天未清
輝幾處愁

闕下逢閻舍人

二月黃鸝飛上林春城紫陌曉沉沉長樂鍾聲
花外盡龍池柳色雨中深陽和不散窮途恨霄
漢長懸捧日心獻賦十年猶未遇羞將白髮戴
華簪

石門春暮

自笑鄙夫多野性貧居數畝半臨湍溪雲雜雨
來茆屋山雀將雛傍藥欄仙籟蒲床閑不厭陰
符在篋老羞看更怜童子宜春服花裏尋師到
杏壇

周賀

贈幼羣法師

北京從別後南越幾聽砧住久白髭出講長黃
葉深香連隣舍像磬徹遠巢禽寂寞應關道何
人見此心

贈拍巖禪師

野寺絕依念空山曾通行老來披袖重病起讀
經生乞食嫌村遠尋溪愛路平多年拍巖住不
識拍巖名

如空上人移居

竹溪人請住何日向中峯瓦舍山晴少齊身病

色濃臘高移生次菊淺露行蹤來往溢城下三
年兩度逢

突拍巖

林迳西風急松枝講抄餘凍髭亡夜剃遺偈病

時書地燥焚身後堂空著影初此時頻下涿涿曾
省到吾廬

寄朱餘慶

已當聽馮夜多事不同居故疾離城晚秋霖見
月踈起鐘關靜戶帶葉卷殘書蕩槩期南去荒
園久廢鋤

玉芝觀張道士房

四面松山合空堂畫老僊蠹根傳雲水曲角積
茶烟道至機心盡宵清琴韻全獨嫌來又去不
得坐經年

再經王叟居

停撓因舊識白髮問波濤以我往來倦知君畊
稼勞渚田臨舍盡坂路出簷高愛此還南去終
期會爾曹

贈李主簿

稅時兼主印每日得閑稀對客放科吏為官亦
典衣案遲吟坐待宅近步行歸見說論詩道應
愁斷是非放一作方

贈厲立侍御

山松逕與瀑泉通巾舄行吟想越中塞鴈去經

華表末鄉僧來自海濤東關分河漢秋鐘絕露
滴彌猴夜岳空抱疾因尋周柱史杜陵寒葉落
無窮

于武陵

客中

楚人歌竹枝游子淚沾衣異國久為客寒宵頻
夢歸一封書未返千樹葉皆飛南過洞庭水更
應消息稀

贈王隱人

石室掃無塵人寰與此分飛來南浦樹半是華

山雲浮世幾多事先應生不聞寒川瀟斜日空
照鴈成群

南游有感

杜陵無厚業不得駐車輪重到曾游處多非舊
主人東風千里樹西日一洲蘋又渡湘江水湘
江水復春

李頻

送人歸新定

歸心常共知歸路不相隨彼此無依倚東西又
別離山雲含雨亞江樹逆潮散莫戀漁樵興人

生各有為

送人南歸

行行野雲薄寒氣日通春故國入芳草滄江終
白身遊歸花落滿睡起鳥啼新不得來書札空
令借問人

宿慈恩遂上人院

滿閣終南色清秋獨倚欄風高斜漢動葉下曲
江寒帝里求名老空門見性難吾師無一事不
似在長安

尋華山隱者

自入華山居關東相見踈匏中誰寄酒葉上我
留書巢鳥寒栖盡潭泉暮凍餘長聞得藥力此
說復何如

贈規上人

竹向空齋合無僧在四鄰去雲離坐石斜月到
禪身樹老風終夜山寒雪見春不知諸祖後傳
印是何人

張司馬別業

庭前樹盡手中栽先後花分幾度開巢鳥戀雛
驚不起野人思酒去還來自拋官與青山近誰

許身為白日催門外尋常行樂處重重履迹在

莓苔

秦系

山中贈張評事時授右衛佐

終年常避喧師事五千言流水閑過院春風與
閉門山客邀上客桂實落華軒莫強教予起微
官不足論

秋晚朱拾遺訪山居

不逐時人後終年獨閉關家中貧自樂石上卧
常閑墜粟添新味殘花帶老顏侍臣當獻納那

得到空山

劉長卿

酬包諫議見寄

佐郡棄頑踈殊方親里閭家貧寒未度身老歲
將除過雪山僧至依陽野客舒藥陳隨遠官梅
發對幽居落日棲鴉鳥行人達鯉魚高文不可
和空愧學相如

尋常山南溪道人隱居

一路經行處莓苔見履痕白雲依靜渚春草閉
閑門過雨看松色隨山到水源溪花與禪意相

對亦忘言

漂母墓

昔賢懷一飯茲事已千秋古墓樵人識前朝楚
水流渚蘋行客薦山木杜鵑愁春草茫茫綠王
孫舊此游

北歸次秋浦界清溪館

萬里猿頻斷孤村客蹙鴈過依彭蠡暮人向宛
陵稀舊路青山在餘生白首歸漸知行近北不
見鷓鴣飛

題思禪寺上方

上方憂旦暮臺殿隱矇矓遠磬秋山裏清猿古
木中一溪連竹路諸嶺共松風儻許棲林下甘
成白首翁

題裴式微餘干東齋亭

世事終成夢生涯半欲過白雲心已矣滄海意
如何藜杖全吾道榴花養太和春風騎馬醉江
月釣魚歌散帙看出蠹開開見雀羅遠山終日
在芳草傍人多吏體莊生傲方言楚俗訛屈平
君莫吊腸斷洞庭波

酬秦系

鶴書猶未至那出白雲來舊路經年別寒潮每
日回家空歸海燕人老發江梅寂憶門前柳閑
居手自栽

新安送穆喻德歸朝

九重宣室召萬里建溪行事直皇天在歸遲白
髮生用才身復起覩聖眼猶明離別寒江上潺
湲若有情

尋洪尊師不遇

古木無人地來尋羽客家道書堆玉案僊帔疊
青霞鶴老難知歲松寒未作花山中不可見何

處化丹砂

松或作梅

月下呈章秀才

自古悲搖落誰家奈此何
夜蚤偏傍枕寒鳥數
移柯向老三年謫當秋百歲多家
惟有月貧空
愧子猷過

送鄭十二歸廬山

潯陽數畝宅歸卧掩柴關
谷口何人在門前秋
草閑忘機賣藥罷不語杖藜還
舊笻成寒竹空
齋向暮山水流過舍下雲去到
人間挂樹花應
發因行寄一攀

長沙王墓下別張南史

長沙千載下春草獨萋萋
流水朝還暮行人東
復西苔碑幾字滅山木萬株齊
唯有年芳在相
看見解携

送李中丞歸漢陽別業

流落征南將曾驅十萬師
罷歸無舊業老去戀
明時獨立三邊靜輕生一劍知
茫茫漢江上日
暮欲何之

過張明府別業

寥寥東郭外白首一先生
考滿孤琴在家移五

柳成夕陽臨水釣春兩向田畊終日空林下何
人識此情

送鄭說之歙州謁薛侍郎

漂泊來千里謳歌滿百城漢家尊太守魯國重
諸生俗變人難理江傳水至清船經危石任路
入亂山行老得滄洲趣春傷白骨情嘗聞馬南
郡門下有康成

謫至干越亭作

天南愁望絕亭上柳條新落日獨歸鳥孤舟何
處人生涯投越徼世業陷胡塵杳杳鍾陵暮悠

悠番水春秦臺悲白首楚澤怨青蘋草色迷征
路鶯聲傍逐臣獨醒翻引笑直道不容身得罪
風霜苦全生天地仁青山數行淚滄海一窮鱗
牢落機心盡唯憐鷗鳥親

秋日登吳公臺上寺寺即陳明徹戰場

古臺搖落後秋入望鄉心野寺來人少雲峰隔
水深夕陽依舊壘寒磬滿空林惆悵前朝事長
江獨至今

碧澗別墅喜皇甫十六侍御相訪

荒村帶返照落葉亂紛紛古路無行客寒林獨

見君野橋經雨斷
澗水向田分
不為憐同病
何人到白雲

吳中贈別嚴士元

東風倚棹闔閭城
水國春寒陰復晴
細雨濕衣看不見
閑花落地聽無聲
日斜江上孤帆影
草綠湖南萬里程
東道若逢相識問
青袍今已誤儒生

過賈誼宅

三年謫宦此棲遲
萬里唯留楚國悲
秋草獨尋人去後
寒林空見日斜時
漢文有道恩猶薄
湘

水無情吊豈知
寂寂江山搖落處
憐君何事到天涯

送柳史君赴袁州

宜陽出守新恩至
京國因家始願違
五柳閉門高士去
三苗按節遠人歸
月明江路聞猿斷
花暗山城見吏稀
惟有郡齋窓裏岫
朝朝長對謝玄暉

獻南平王

建牙吹角不聞喧
亂世登壇衆所尊
象散萬金酬士死
身持一劍答君恩
漁陽老将多回席
魯

國諸生半在門白馬翩翩春草細邵陵西去獵
平原

次陸安寄友人

新年草色遠萋萋。客將歸失路蹊。暮而不知萋
澗口處春風只到穆陵西。孤城盡日空花落。三
戶無人但鳥啼。君在江南相憶否。門前五柳幾
枝低。

李嘉祐

南浦渡口

寂寞橫塘路。新篁覆水低。東風潮信滿。時雨稻
秔齊。寡婦供租稅。漁人逐鼓鼙。慚無卓魯術。解
印謝黔黎。

送房明府罷長寧令

君為萬里宰。恩及五湖人。未滿先求退。居閑不
厭貧。遠峰晴更近。殘柳雨還新。要自趨丹陛。明
年雞樹親。

送岳州司馬弟之任

岳陽天水外。念爾一颿過。野墅人煙少。山林鴈
影多。有時巫峽色。終日洞庭波。丞相今為郡。應
無勞者歌。

送王牧往吉州謁史使君叔

細草綠汀洲
王孫耐薄游
年華初冠帶
文體舊
弓裘野渡花
爭發春塘水
亂流使君憐
小阮應
念倚門愁

自常州還江陰道中

處處空籬落
江村不忍看
無人花色慘
多雨鳥
聲寒黃霸初
臨郡陶潛未
罷官乘春務
征伐誰
肯問凋殘

和都官苗員外秋夜寓直對雨書所懷

多雨唐宮夜
仙郎寓直時
漏長丹鳳關
秋冷白
雲司螢影侵
堦亂鴻聲出
苑遲蕭條吏
人散小

謝有新詩

唐一作南

與從弟正字兄兵曹宴集

竹窓松戶有佳期
美酒香茶慰所思
輔嗣外甥
偏解易惠連
羣從搃能詩
簷前花落春深後
谷口鶯啼日暮時
去路歸家仍待月
垂鞭不控馬
行遲

暮春宜陽郡齋愁坐忽聞枉劉七侍御

詩因以酬答

子規夜夜啼
櫺葉遠道逢
春半是愁芳
草伴人

還易老落花隨水亦東流山臨睥睨常多雨地
接瀟湘畏及秋惟羨君為周柱史手持黃紙到
滄洲

揚巨源

從太和公主和蕃

北路古來難年光獨認寒朔雲侵鬢起邊月向
眉殘蘆井尋沙到花門度磧看薰風一萬里來
處是長安

春日奉酬聖壽無疆詞

代是文明晝春當宴喜時爐烟添柳重宮漏出

門逢漢典方寬律周官正採詩碧霄傳鳳吹紅
旭在龍旗造化膺神器陽和沃聖慈無因隨百
獸率舞在丹墀門或作花

劉得仁

題故靜祥院

寂寞身何在門人隔此生影懸塵已厚塔種栢
初成溪院秋先雪空堂古有精當時挂錫樹樹
老數枝傾

宿僧院

禪地無塵夜焚香話所歸樹搖幽鳥夢螢入定

僧衣破月斜天半高河下露微翻蓄令嫌白日動
即與心違

昊天觀新栽竹

清風披葉上山鳥棲來根別古溝岸影生秋已
觀苔遍思諸草木惟此出塵埃恨為移居晚空
庭更擬栽

朱慶餘

上江州李負外

起家聲望重自古更誰過得在朝廷少還因諫
諍多經年愁瘴癘幾處想恩波入境無餘事唯

聞父老歌

送淮陰丁明府

之官未及境已有愛人心遣吏回中路停船對
遠林鳥聲淮浪靜雨色稻苗深暇日公門掩唯
聞伴客吟

上張水部

出入門闌久兒童亦有情不忘將姓字長說向
公卿每許連床坐時聞並馬行恩深轉無語懷
抱自分明

送靈州幘官韋校書

共知行樂處猶識此時分職已為書記官曾校
典墳寒城初落葉高樹遠生雲邊事何須問深
謀只在君

哭胡遇

尋僧昨夜尚相隨忽見緋幡意可知題處舊詩
休更讀置來新馬憶曾騎不應隨分空營奠終
擬求人為立碑每作宣陽里中過遙聞哭臨_泣涼
先垂

雍陶

送裴璋還蜀

家在劔門外新年音信稀自為千里別已送幾
人歸陌上日初落馬前花正飛離言殊未盡春
雨滿行衣

塞上宿野寺

塞上蕃僧老天寒疾上關遠烟平似水高樹暗
如山去馬朝常急行人夜始閑更深聽刁斗時
到磬聲間

同賈島宿無可院

何處消愁寞携囊就遠僧中宵吟有雪空屋語
無燈靜院惟聞鐸寒床但枕肱還因愛閑客始

得見南能

寄宗靜上人

世上方傳法山中未得歸
閑花飄講席馴鶴污禪衣
積雨誰過寺殘鐘自掩扉
寒來垂頂帽白髮剝應稀

即士元

送友人別

暮蟬不可聽落葉豈堪聞
共是悲秋客那知此路分
荒城背流水遠鴈入寒雲
陶令門前菊餘花可贈君

送奚賈歸吳

東南富春渚曾是謝公游
今日奚生去新安江正秋
水容清過客楓葉落行舟
遙想赤亭下聞猿應夜愁

送彭將軍赴定州

雙旌漢飛將萬里授橫戈
春色臨關盡黃雲出塞多
鼓鼙悲絕漠烽火隔長河
莫斷陽山路天驕已請和

冬夕寄青龍寺源公

斂履入寒竹安禪過漏聲
高杉殘子落深井凍

痕生罷磬風枝動懸燈靈屋明何當招我宿乘
月上方行

崔塗

旅舍別故人

一日又欲暮一年看又殘病知新事少老別舊
交難山盡路猶險雨餘春尚寒那堪試回首烽
火是長安

蜀城春望

天涯憔悴身一望一霑巾在處有芳草滿城無
故人懷才皆得路失計獨傷春青鏡不忍照鬢

毛應更新

夕次洛陽道中

秋風吹故城城下獨吟行高樹鳥已息古原人
尚耕流年川暗度往事月空明不復嘆岐路馬
頭塵夜生

屈原廟

讒勝禍難防沈寃信可傷本畲安楚國不是怨
懷王廟古碑無字洲暗蕙有傷獨醒人尚少誰
與奠椒漿

孤鴈

幾行歸塞盡念爾獨何之暮雨相呼失寒塘欲
下暎渚雲低暗度關月冷相隨未必逢矰繳孤
飛自可疑

除夜有感

迢遞三巴路羈危萬里身亂山殘雪夜孤燭異
鄉人漸與骨肉遠轉於童僕親那堪正漂泊明

日歲華新

春日旅懷

水流花謝兩無情送盡東風過楚城胡蝶夢中
家萬里杜鵑枝上月三更故園書動經年別華

髮春惟兩鬢生自是不歸歸便得五湖烟景有
誰爭

皇甫曾

送著公還越

誰能愁此別到越解相逢長憶雲門寺門前千
萬峰石床埋積雪山路斷枯松莫學白道者無
人知去蹤

寄劉長卿

南憶新安郡千峰帶夕陽斷猿知夜久秋草助
江長踈髮應成素青松獨見霜愛才稱漢主題

柱待田郎

皇甫冉

巫山高

巫峽見巴東迢迢出半空雲藏神女館雨到楚
王宮朝暮泉聲落寒暄樹色同清猿不可聽偏
在九秋中

送韓司直

又載劉
隨州集

游吳還適越來往往任風波復送王孫去其春如
草何山明殘雪在湖滿夕陽季子留多遺廟停
舟試一過

西陵寄一公

西陵遇風處自古是通津終日空江上雲山若
待人汀洲寒事早魚鳥興情新南望山陰路吾
心有所親

送元盛歸潛山

深山秋事早君去復何如衰露收新稼迎寒葺
舊廬題詩即招隱作賦是閑居別後空相憶嵇
康懶寄書

酬崔侍御期籍道士不至見寄

一心求妙道幾歲候真師丹竈今何在白雲無

定期崑崙烟景絕汗漫往來遲君但焚香待人
間到有時

送王相公赴幽州

自昔蕭曹德難兼衛霍功勤勞無遠近旌節屢
西東不選山河卒還令萬里通御閑分善馬武
庫出琯弓遮虜關山靜防秋鼓角雄徒思一攀
送羸病華門中

獨孤中丞遙陪餞帝使君赴昇州

中司龍節貴上客虎符新地控吳襟帶才光漢
摛紳汎舟應度臆入境便行春何處歌來暮長

干建業人

三月三日嘉興李明甫後亭汎舟

江南烟景復如何聞道新亭更可過處處藝蘭
春浦綠萋萋畊草遠山多壺觴雖就陶彭澤風
俗猶傳晉永和更使輕橈徐轉去微風落日水
增波

秋日東郊作

閑看秋水心無事卧對寒松手自栽廬嶽高僧
留偈別茅山道士寄書來燕知社日辭巢去菊
為重陽冒雨開淺薄將何稱獻納臨歧終日自

徘徊

包佶

嶺下卧病寄劉長卿

惟有貧兼病能令親愛踈
歲時供放逐身世付空虛
脛弱秋添絮頭風晚廢梳
波瀾喧衆口藜藿靜吾廬
喪馬思開卦占鴉懶發書
十年江海隔離恨子知予

司空曙

耿緯就宿因傷故人

舊時聞笛淚此夜重沾衣
方恨同懷少那堪相

見稀竹烟凝澗壑林
雪似芳菲多謝勞車馬
應怜獨掩扉

過寶慶寺

黃葉前朝寺無僧寒殿開
池晴龜出曝松暮鶴飛
回古井碑橫草陰廊畫
雜苔禪宮亦銷影塵世
轉堪哀

雲陽館與韓申卿宿別

故人江海別幾度惜^隔山川
乍見番疑夢相悲各問年
孤燈寒照雨濕竹暗浮烟
更有朝明恨離杯惜共傳

春日野望寄錢貞外起

草長花落樹羸病強尋春無復少年意空餘華
髮新青原晴見水白社靜逢人寄謝南宮客軒
車不可親

喜外弟盧綸見宿

靜夜無四隣荒居舊業貧雨中黃葉樹燈下白
頭人似我獨沈又愧君相見頻平生自有分况
號蔡家親號一作是

送王閏

相送臨寒水蒼茫望故關江燕連夢澤楚雲入

商山話我他年舊看君此日還因將自悲淚一
洒別離顏

耿緯

邠州留別

終歲山川路生涯竟若何艱難為客慣貧賤受
恩多暮角飄殘韻寒流起細波懸愁茂陵宅喜
色又相過

早朝

鐘鼓餘聲裏千官向紫微冒寒人語少乘月燭
來稀清漏聞馳道紅霞映鎖闈猶看嘶馬處未

啓掖垣扉

贈張將軍

寥落軍城暮重門返照間鼓鞞經雨暗士馬過
秋閑慣守臨邊郡曾營近磧山關西舊業在夜
夜夢中還

沙上鴈

衡陽多道里弱羽復哀音還塞欲何處驚絃亂
此心夜陰前侶遠秋冷後湖深獨立沙汀意寧
知霜霰侵

贈朗公

來自西天竺持經奉紫微年深梵語變行苦俗
流歸日上安禪久苔生出院稀梁間有馴鴿不
去為無機

嚴維

送李端

故關衰草遍離別正堪悲路出寒雲外人歸暮
雪時少孤為客早多難識君遲掄泣空相向風
塵何所期

酬劉貞外見寄

蘇耽佐郡時近出白雲司藥補清羸疾窻吟絕

妙詞柳塘春水漫花塢夕陽遲欲識懷君意朝
朝問檝師

李端

巫山高

巫山十二峰皆在碧虛中迴合雲藏日霏微雨
帶風猿聲寒過水樹色莫連空愁向高堂宿清
秋見楚宮

聞蟬寄友人

昨日始聞鶯今朝蟬又鳴朱顏向白日定是幾
年程故國白雲遠閑居秋草生因垂數行淚書

寄十年兄

茂陵山行陪韋金部

宿雨朝來歇空山天氣清盤空雙鶴下隔水一
蟬鳴古道黃花落平蕪赤燒生茂陵雖有病猶
得伴君行

雲際中峯

自得中峯住深林亦閑關經秋無客到入夜有
僧還暗澗泉聲小荒岡樹影閑高亭不可望星
月滿空山

韓翃

題薦福衡嶽禪師房

春城乞食還高論此中閑僧臘堦前樹禪心江
上山踈簾看雪卷深戶映花關晚送門人去鐘
聲杳靄間

送元詵還江東

過江秋色在詩興與歸心客路綠楓岸家人掃
橘林潮聲當畫起山翠近南深幾日華陽洞寒
花引獨尋

送王相公赴幽州

黃閣開帷幄丹墀拜冕旒位高湯左相權總漢

諸侯不改周南化仍分趙北憂雙旌過易水千
騎入幽州塞草連天暮邊風動地秋無因陪遠
道結束佩吳鉤

戴叔倫

除夜宿石頭驛

旅館誰相問寒燈獨可親一年將盡夜萬里未
歸人寥落悲前事支離笑此身愁顏與衰鬢明
日又逢春

吳明府留遠至留宿

出門逢故友衣服滿塵埃歲月不可問山川何

處來綺城容弊宅散職寄靈臺自此留君醉相
懽得幾回

逢許評事

萬里楊柳色出關逢故人輕烟覆流水落日照
行塵積夢江湖遠憶家兄弟貧裴徊灞亭上不
語共傷春

漸次涪州先寄王貞外使君

文教通夷俗均輸問火田江分巴子水樹接夜
郎烟毒瘴含秋氣陰厓閉曙天路難空計日身
老不由年將命寧知遠歸心詎可傳星郎復何

事出守五溪邊

汝南別董校書

擾擾倦行役相逢陳蔡間如何百年內不見一
人閑對酒惜餘景問程愁亂山秋風萬里至又
出穆陵關

盧綸

題苗貞外林亭

高甃絕行塵開簾似有春風傾竹上雪山對酒
邊人步暖先逢日書空遠見隣還因內齋暇登
賞及諸姻

得嶺南故人書

瘴海寄雙魚中宵達我居
兩行燈下淚一紙嶺南書
地說炎蒸極人稱老病餘
殷勤報賈誼莫共酒杯踈

春日同李庶子遵善寺東院曉望

映竹水橫分當山起鴈羣
陽峯高對寺陰井下通雲
畫惟逢鶴花時此見君
由來禪誦地多有謝公文

題興善寺後池

隔窻棲白鳥似與鏡湖隣
月照何年樹花逢幾

世人岸莎青有露苔迺
綠無塵願得依容止僧
中老此身

李沆園林

古巷牛羊出重門接柳陰
閑看入竹路自有向山心
種藥齊幽樹畊田到遠林
願同詞賦客得興謝家深

酬暢當嵩山尋道士見寄

聞逐樵夫閑看棋忽逢人
世是秦時開雲種王嫌山
淺度海傳書恠鶴遲陰洞
石幢微有字古壇松樹半
無枝煩君遠示青囊籙願
得相從一

問師

晚次鄂州

雲開遠見漢陽城，猶是孤颿一日程。
估客畫眠知浪靜，舟人夜語覺潮生。
三湘愁鬢逢秋色，萬里歸心對月明。
舊業已隨征戰盡，更堪江上鼓鼙聲。

祖詠

蘇氏別業

別業居幽處，到來生隱心。
南山當戶牖，豐水在園林。
竹覆經冬雪，庭昏未夕陰。
寥寥人境外，閑

坐聽春禽

蘭峰贈張九臯

文苑作扈從御宿池

君王既巡狩，輦路入秦京。
遠樹低蒼壘，孤山入草城。
寒踈清禁漏，夜警羽林兵。
誰念迷方客，長懷魏國情。
蒼一作捨
草一作悞

綦毋潛

宿龍興寺

香刹夜忘歸，松清古殿扉。
燈明方丈室，珠繫比丘衣。
白月傳心淨，青蓮喻法微。
天花落不盡，處處鳥銜飛。

方干

寄李頻

衆木已搖落望君猶未還
軒車在何處雨雪滿
前山思苦文星動鄉遙釣渚閑
明年見名姓惟我獨何顏

君不來

閑花未零落心緒已紛紛
久客無人見新禽何處聞
舟隨一水遠路出萬山
分夜月生愁望孤光必照君

白艾原客

原上桑柘瘦再來還見貧
滄洲幾年隱白髮一莖新
敗葉平空墜殘陽滿近隣
閑言說知己半是學禪人

鏡湖西島言事寄陶校書

樵獵兩三戶惆疎是近隣
風雷前壑雨花木後巖春
文字不得力桑麻難捄貧
山禽欺稚子夜犬吠漁人
未必聖明代長將雲水親
知音不延薦無路出泥塵

旅次洋州寓居郝氏林亭

舉目縱然非我有思量
似在故山岑鶴盤遠勢

投孤嶼蟬曳殘聲過別枝凉月照窓欹枕倦澄
泉透石泛觴遲青雲未得平行去夢到江南身
旅羈

龍泉寺絕頂

未明先見海底日良久遠雞方報晨古樹含風
常帶雨寒巖四月始知春中天爽氣星河近下
界時豐雷雨勻前後登臨思無盡年年改換往
來人

經陸補闕故山

不敢要君徵亦起致君全得似唐虞謹言昨嘆

離天聽新塚今聞入縣圖琴鎖壞窓風自響鶴
歸喬木夜難呼學書弟子何在檢點猶逢諫
草無

靈一

同史君宿大梁驛

旌旗江上出花外卷簾空夜色臨城月春寒度
水風雖然行李別且喜諱音同若問康廬事終
身愧遠公

重還宜豐寺

再過松招隱寺重會息心期樵客聞歸日山僧記

別時野雲陰遠
旬秋雨漲前陂
勿謂頻來此吾
今不好奇

酬皇甫冉將適越於雲門寺贈別

湖南通古寺來
往意無涯欲適
雲門寺千峯到
若耶春山子敬
宅古木謝敷家
自可長偕隱那
言相去賒

無可

晚秋寄賈島

暗蒼生暮色默
思坐西林聽雨
寒更盡開門落
葉深昔因京邑
病併起洞庭心
亦是吾兄事遲

回直至今

送呂郎中赴海州

出守滄洲上西
風送佩旌路遙
過幾郡地盡到
孤城拜廟千山
綠開樓遍海晴
何人共東望月
向積濤生

同劉升宿

浮雲流水心只
是愛山林共恨
多年別相逢一
夜吟既能持苦
節勿謂少知音
憶就西池宿月
圓松竹深

護國

贈王山人

湖上見秋色曠然如爾懷豈惟歡隴畝兼亦外
形骸待月歸山寺彈琴坐暝齋布衣閑自貴何
用謁天階

貫休

寒思廬山賈生

山兄詩癖甚寒夜更何為覓句如頑石嚴霜打
不知石膏粘木屐厓粟落水池近見禪僧說生
涯勝往時

如一作唯
石一作坐

題簡禪師院

機忘室亦空靜與沃州同惟有半竹庭能生竟
日風思山海月上出定印香終繼後傳衣者還
湏立雪中

岑參

送韋侍御先歸京

聞欲朝龍闕應湏拂豸冠風霜隨馬去炎暑為
君寒客淚題書落鄉愁對酒寬先憑報親友後
月到長安

送鄭少府赴滏陽

子真河朔尉里邑帶青漳春草迎袍色晴花拂

綬香青山入官舍黃鳥出宮牆若到銅臺上應
憐魏寢荒

張衆甫

送李司直使吳

使臣方擁傳王事遠辭家震澤逢殘雨新豐過
落花水萍千葉散風柳萬條斜何處看離恨春
江無限沙

張南史

送余贊善使還赴薛尚書幙

音書不可論河塞雪紛紛鴈足期蘇武狐裘見

薛君城池通紫陌鞍馬入黃雲遠憶漳渠水平
流幾處分

周朴

寄方干

桐廬江水閑終日對柴關因想別離處不知多
少山釣舟春岸泊庭樹晚烟還莫便求栖隱桂
枝堪恨顏烟一作鶯

張贛

送董卿知台州

九陌除書出尋僧問海城家從中路挈吏隔數

州巡夜蚌侵燈影春禽雜櫓聲開圖見異跡思
上石橋行

吊孟浩然

每聽樵人說孤墳亦夜吟若重生此世應更苦
前心名與襄陽遠詩同漢水深親栽鹿門樹猶
蓋石床陰

別後寄友人

上馬如飛鳥翩然去隔塵共看今夜月獨作異
鄉人就養江田熟移居井賦新襄陽所卜隱應
與孟家隣

張祐

觀徐州李司空獵

曉出郡城東分圍淺草中紅旗開向日白馬驟
迎風背手抽金鏃翻身控角弓萬人齊指處一
鴈落寒空

招隱寺

千年戴顓宅佛廟此崇修古井人名在清泉鹿
跡幽竹竅寒閉院山影夜藏樓未得高僧旨烟
霞空蹇遊

金山寺

一宿金山寺微茫水國分
僧歸夜船月龍出曉
堂雲樹影中流見鐘聲
兩岸聞因悲在朝市終
日醉醺醺

惠山寺

舊宅人何在空門客自過
泉聲到池盡山色上
樓多小洞斜穿竹重攔
夾細莎慙慙望城市雲
水暮鐘和

李季蘭

送韓揆之江西

相看指揚柳別恨轉依依
萬里西江水孤舟何

處歸湓城潮不到夏口
信應稀惟有衡陽鴈年
年來去飛

許渾

筭山津送客歸峽中

津亭多別離揚柳半無枝
住接猿啼處行逢鴈
過時江颿望風急山月下樓遲
此夕歸城郭不眠人詎知

凌歊臺

宋祖高凌歊樂未回三千歌舞宿層臺
湘潭雲盡暮山出巴蜀雲消春水來
行殿有基荒薺合寢

園無主野棠開百年便作萬年計巖畔古碑空
綠苔

張祐佐

憶遊天台寄道流

憶昨天台到赤城幾朝僊籟耳中生雲龍出水
風聲急海鶴鳴臯日色清石筍半山移步險桂
花當澗拂衣輕今來盡是人間夢劉阮茫茫何
處行

馬戴

集宿姚侍御宅懷永樂宰殷侍御

石田虞芮接種柳白雲陰穴閉神踪古河流禹
鑿深樵人應滿郭僊鳥幾巢林此會偏相語曾

供靈夜吟

供一作同

送人游蜀

別離楊柳陌迢遞蜀門行若聽清猿後應多白
髮生虹霓侵棧道雨雪雜江聲過盡愁人處烟
雲是錦城

張循之

巫山高

巫山高不極合沓竒狀新暗谷疑風雨幽崖若

鬼神月明三峽曙
潮滿九江春
若問陽臺客
應知入夢人
九或二

張繼

嚴陵釣臺

舊隱人如在
春風亦似秋
客星沉夜壑
釣石俯清流
鳥向喬枝聚
魚依淺瀨游
古來芳餌下
誰是不吞鉤

章八元

新安江行

江源南出永野
飯甍維梢古戍
懸漁網空林露

鳥巢靈暗山脊
見沙淺浪痕交
自笑無媒者逢

人作解嘲

李益

喜外弟文言別

十年離亂後
長大一相逢
問姓驚初見
稱名憶舊容
別來滄海事
語罷暮天鐘
明日巴陵道
秋山又幾重

同崔邠登鶴雀樓

鶴雀樓高百尺墻
汀洲寒樹共茫茫
漢家簫鼓隨流水
魏國山河滿夕陽
事去千年猶恨速
愁

來一日即為長風煙併是思歸望遠目非春亦
自傷

張喬

題河中鵲雀樓

高樓懷古動悲歌鵲雀今無野燕過樹隔五陵
秋色早水連三晉夕陽多漁人遺火成寒燒牧
笛吹風起夜波十載重來值搖落天涯歸計欲
如何

呂溫

道州秋夜南樓即事

誰令獨坐愁此日此南樓雲去舜祠閑月明湘
水流猿聲何處曉楓葉滿山秋不照匣中鏡少
年看白頭

于鵠

贈隱者

去尋長不在門似絕人行床下石苔滿屋頭秋
草生學琴冬日短寫易曉窻明惟到黃昏後溪
中聞磬聲

崔顥

贈梁州張都督

聞君為漢將虜騎不南侵
出磧清沙漠還家拜
羽林風霜臣節苦歲月主恩深
為語西河使知予報國心

項斯

春題湖上顧代新居

近得雲山看門長侵早開
到時猶有雪行處已無苔
勸酒客初醉留茶僧未來
每逢晴暖日惟見乞花栽

送殷乘游邊

語別無長夜燈前聞曙鴉
已行難避雪何處合

逢花隴寺門多閉荒樓酒不賒
還須問邊將早晚是誰家

山中

青櫪林中亦有人一渠流水數家分
山當午後回峯影草帶泥痕過鹿群
蒸茗氣衝茅屋出縹緲聲隔竹籬聞
行逢賣藥歸來客不惜相隨入白雲

崔峒

贈李明府

訟堂寂寂對烟霞五柳門前聚晚鴉
流水聲中

視公事寒山影裏見人家觀風競美新為政計
日還應便觸邪可惜陶潛無限酒不逢籬菊正
開花

包何

和程負外春日東郊即事

即官休浣恰遲日野老歡娛為有年幾處折花
驚蝶夢數家留粟待蠶眠藤垂委地縈朱履泉
長侵階浸綠錢直到閉關朝謁去鶯聲不散柳
如煙

竇常

之任武陵寒食日途次松滋渡先寄劉

負外禹錫

杏花榆莢曉風前雲際離離上峽船江轉數程
淹驛騎楚曾三戶少人煙看春又過清明節算
老重經癸巳年幸得枉桂山當郡舍在朝長恨卜
居篇

趙嘏

長安秋望

雲物淒涼拂曙流漢家宮闕動高秋殘星數點
鴈橫塞長笛一聲人倚樓紫艷半開籬菊淨紅

衣盡落渚蓮愁鱸魚正美不歸去空戴南冠學
楚囚

薛能

獻僕射相公

清如水玉重如山百辟嚴趨禮絕攀強虜外聞
應破膽平人長見盡開顏朝廷有道青春好門
館無私白日閑致卻垂衣更何事幾多詩句詠
關關

劉威

遊東湖黃處士園

偶向東湖更向東數聲雞犬翠微中遙知楊柳
是門處似隔芙蓉無路通樵客出來山帶雨漁
舟過去水生風物情多與閑相稱所恨求安計
不同

鄭谷

鷓鴣

暖戲烟蕪錦翼齊品流應得近山雞雨昏青草
湖邊過花落黃陵廟裏啼遊子乍聞征袖濕佳
人纔唱翠眉低相呼相喚湘江曲苦竹叢深春
日西

韓偓

寄隱者

煙郭雲高路不遙，懷賢猶恨太迢迢。
長松夜落欒千股，小港春深水半腰。
已約病身拋印綬，不嫌門巷似漁樵。
渭濱晦迹南陽卦，若比吾徒更寂寥。

羅隱

揚州開元寺閣上作

滿檻山川漾落暉，檻前前事去如飛。
雲中雞犬劉安過，月下笙歌煬帝歸。
江蹙海門帆散出，地

吞淮口樹相依，紅樓翠幙知多少。
長向東風有是非。

李羣玉

黃陵廟

小孤洲北浦雲邊，二女明粧共儼然。
野廟向江春寂寂，古碑無字草芊芊。
東風近墓吹芳芷，落日深山哭杜鵑。
猶似含嚔望巡狩，九疑如黛隔湘川。

湘川

皮日休

過雲居院福上人舊居

重到雲居獨悄然
隔窓窺影尚疑禪
不逢野老來聽法
猶見隣僧為引泉
龕上已生新石耳
壁間空帶舊茶烟
南宗子弟時時到
泣把山花奠几筵

杜荀鶴

春宮怨

早被嬋娟誤欲粧
臨鏡慵承恩不在貌
教妾若為容
風暖鳥聲碎日高花影重
年年越溪女相憶采芙蓉

茅山

步步入山門
仙家鳥遶分漁樵
不到處麋鹿自成羣
石面迸出水松頭穿破雲
道人星月下相次禮茅君

訪道者不遇

寂寂白雲門
尋真不遇真
只應松上鶴便是洞中人
藥圃花香異沙泉鹿跡新
題詩留姓字他日此相親

題王處士書齋

先生高興似樵漁
水鳥山猿一處居
石逕可行苔色厚
釣竿時斫竹叢踈
欺春只愛和醅酒
諱

老猶看夾注書莫道無金空有壽有金無壽欲
何如

題覺禪

少見修行得似師茅堂佛像亦隨時禪衣袖後
雲藏線夏臘高來雪印眉畊地戒侵連塚土伐
薪教護帶巢枝有時問着經中事却道山僧揔
不知

張籍

薊北春懷

渺渺水雲外望來鄉信稀因逢過江使却寄在

家衣問路更愁遠送人空說歸今朝薊城北又
見塞鴻飛

過賈島幽居

青門坊外住行坐見南山此地去人遠知君終
日閑蛙聲籬落下草色戶庭間好是經過處惟
愁暮獨還

羅道士

城市無人得實年衣襟長帶臭黃烟樓中賒酒
唯留藥洞裏爭棋不賭錢聞客語音知貴賤對
花歌詠似狂顛尋常行處皆逢見世上多疑是

謫仙

任藩

葛仙井

古井碧沉沉分明見百尋
味甘傳邑內脉冷應
山心圓八月輪淨直涵
峯影深自從仙去後
汲引到如今

秋晚途次

秋色滿行路此時心不閑
孤貧遊上國少壯有
衰顏衆鳥已歸樹旅人
猶過山蕭條遠林外風
急水潺潺

劉商

春日卧病

楚客經年病孤舟人事稀
晚晴江柳變春夢塞
鴻歸今日方知命前身自
覺非不能憂歲計無
限故山薇

楊發

南溪書院

茆屋住來久山深不置門
草生垂井口花落擁
籬根入院將鷓鴣鳥攀
蘿抱子猿曾逢異人說
風景似桃源

處默

題勝果寺

路自中峯上盤回出薜蘿到江吳地盡隔岸越
山多古木叢青靄遙天浸白波下方城郭近鐘
磬雜笙歌

戎昱

羅江舍

山縣秋雲暗茆亭暮雨寒自傷庭葉下誰問客
衣單有興時添酒無聊自整冠近來國鄉夢夜
夜到長安

于良史

冬日野望長安

地際朝陽滿天邊宿霧收風兼殘雪起河帶斷
冰流北闕馳心極南圖尚旅遊登臨思不已何
處可銷憂

王灣

次北固山下

客路青山外行舟綠水前潮平兩岸闊風正一帆
懸海日生殘夜江春舊年鄉書何處達歸鴈洛
陽邊

林寬

送惠補闕

詔下徵巖野高人入仕林長因抗疏日更作去
官心清俸供僧盡滄州寄跡深東門有歸路徒
自棄華簪

劉禹錫

蚤春對雪寄澧州元郎中

新賜除書墨未乾賢人暫屈遠人安朝驅旌旆
行時今夜見星辰憶舊官梅蘂覆階鈴閣煖雪
峰當戶戟枝寧寒知楚客思公子北望長吟澧

有蘭

送河南馮尹之任

可憐五馬風流地暫綴金貂侍從才閣上掩書
劉向去門前修刺孔融來峻陵路靜寒無雨洛
水橋長晝起雷却羨府中棠隸好先於城外百
花開

裴相公見示荅張秘書謝馬并^詩羣公屬

和

草玄門巷少塵埃丞相并州寄馬來初自塞垣
銜苜蓿忽行幽徑破莓苔尋花緩轡威遲去帶

酒垂鞭蹀躞回不與王侯與詞客知輕富貴重
清才

酬竇使君寒食日松滋先寄

楚鄉寒食橘花時野渡臨風駐彩旗草色連雲
人去住水紋如縠燕差池朱輪尚憶雙飛雉青
綬猶懸左顧龜非是漁湓城白司馬水曹何事
與新詩

寄郎州溫右史曹長

暫別瑤池鴛鷺行綠旗雙引到沅湘城邊流水
桃花過簾外春風杜若香史筆在將書紙尾朝

纓不稱濯滄浪雲臺功業家聲在徵詔何時出
建章

江陵汧流道中

三千三百西江水自古如今要路津月夜歌謠
有漁父風天氣色屬商人沙村好處多逢寺山
葉紅時各勝春行到南朝征戰地古來名將盡
為神

酬樂天揚州初逢席上見贈

巴山楚水淒涼地三十三年棄置身懷舊空吟
聞笛賦到都翻似爛柯人沉舟側畔千舫過病

木前頭萬葉春今日聽君歌一曲暫憑杯酒長精神

題于家公主舊宅

樹滿荒臺葉滿池簫聲一絕草虫悲鄰家猶學
宮人髻園客爭偷御菓枝馬埒蓬蒿藏狡兔鳳
樓烟雨嘯愁鷗何郎獨在無恩澤不似當年傳
粉時

王貞白

金陵

恃險不種德興亡歎數窮石城幾換主天塹漫

連空御路疊民塚臺基聚牧童折碑猶有字多
紀晉英雄

衆妙集卷終

嘉靖丙申臘月晦日宋本摹書時寓繡石堂

五十五



